

左恪靖侯奏稿續編

恪靖奏稿續編卷四十三目錄

河州撫事漸可就緒片

逼攻肅州大勝摺

北路零匪殲滅殆盡摺

剿辦甘南零匪情形片

奏整飭甘南潰軍片

福建甘捐變通辦理片

成祿難期得力片

河州撫事漸可就緒片

再河州撫事漸可就緒馬匹已繳過三千四百餘匹又
子鎗及長矛雜械已繳過七千餘件隨教漢民已拔出
六百餘戶安插安定縣轄各境回目馬占鼇馬京大等
復自限半月揀繳就械悉數完畢再請委員察驗情狀
尙屬可信前敵各營及護運各營均就地興屯廣行耕
墾臣復將河內所繳馬匹分別留營及填補驛馬餘均
散給各州縣貧農據各處稟報流亡稍聚荒絕之產耕
墾日多入春計難民戶口散給種籽賑恤經費已屬不

費然兵屯民屯星羅棋布災民日衆土地日闕無論地方可糞漸次復元將來糧食日多採運之費亦資節省矣甘南一帶軍務宜

旨斬決潰逃將弁田大勝李天禧徐正華張承前文志
懿懌得勝等并飭及時裁汰撤遣籍隸外省者給以盤
川勒令歸籍籍隸本省者給以賑種勒令歸農察看情
形已就肅讞其西甯拉周已飭道員馮邦棟前赴平番
會商妥辦准豫師咨稱米拉溝回亦急思就撫徐占彪
前准收撫之缺則馬長順等旋因逆族殺護送寶璽之

陝回二十餘名疑懼不釋遂挈其眷屬赴西甯就撫現
飭馮邦棟一併察辦徐占彪報續獲勝仗肅州逆首馬
四受傷回城亦有投誠之說據署甘涼道蕭宗幹稟之
州甘州所屬近均安帖驛路疏通是嘉峪關以內似有
肅清之望也其陝甘各回零騎剽掠在承平時亦所難
免然至多者不過二三百騎少僅數十騎除南路北路
中路各營隨時搜捕均有擒斬逆猷潛消近惟狗齒牙
一起三百餘騎竄擾花馬池及陝西定邊安邊等處雖
據蕭章開兩次掩捕擒斬近百名並奪其馬然逆賊見

兵卽竄未能聚斂聞已東竄臣已嚴飭劉厚基成定康
督令防營迅圖撲滅料亦無能爲患耳謹將現在辦理
大致附片陳明仰慰

茲歷其詳細情形容俟續報緣辦回與辦捻髮各逆事
體不同陝甘兵藁頭緒繁雜特甚奏事難清眉目難成
片畧恐煩

聖覽心切不安謹一併具陳伏乞

聖鑒謹

奏

同治十一年三月十九日

軍機大臣 字寄同治十一年四月初七日奉

上諭左宗棠奏河州撫局漸可就緒並現在辦理大概情形等語河州回目馬占鰲等已呈繳馬匹器械自限半月悉數完繳再請委員察驗米拉溝回眾亦思就撫昨據豫師奏報已諭令該大臣等妥慎籌辦甘省回族眾多性情狡譎現雖乞撫是否真心悔罪尙不可知且議撫後必須措置咸宜使彼族輸誠悅服方免滋生事端該大臣總當籌畫萬全慎益加慎斷不可掉以輕心遷就了事致異日重煩兵力該回等每以乞撫緩師悉

力東作俟春耕事畢仍圖抗拒官軍此等詭計尤應嚴防是在該大臣酌度機宜妥爲籌辦免致爲其所紿西甯撫局應飭馮邦棟詳慎辦理肅回雖有投誠之說並未大受懲創仍應嚴飭徐占彪實力勦洗切勿墮逆回狡計其狗齒牙一股及零星回騎左宗棠當督飭各營迅圖撲滅靖蕩逆氣以靖疆圉將此由五百里諭令知之欽此

軍機大臣 字寄同治十一年三月二十日奉

上諭文麟奏肅州回逆出關肆擾暨李生元所部未能
拔赴濟木薩各摺片肅州大股賊匪復行出關攻陷雙
塔堡汛城頭起賊隊已有竄赴敦煌之信該處本有威
儀馬步隊及新中營勇丁駐紮防堵卽著文麟飭令各
營會同戶勇及在城官兵協力堵禦毋任賊匪深入成
祿當督率所部剋期出關迅將此股竄匪盡數殲除鼓
行而西不得再涉遲延致滋貽誤景廉後路轉運事宜
據文麟奏稱哈密車駝短缺又乏餘糧轉運難於籌辦

請令鎮迪道出關專辦後路轉運各事宜等語鎮迪道員缺已有旨簡放恩綸照景廉所請令由北路赴任所有景廉後路糧運著左宗棠另派道府大員兼程出關妥爲料理以濟軍食該大臣派員出關勢難迅速仍著文麟隨時設法兼顧毋稍膜視哈密東路時有賊氛李生元所部駐紮二堡未能調赴濟木薩一帶現在張玉春等已率所部飭抵景廉軍營該都統當酌度情形或能另撥一軍協防濟木薩俾李生元所部仍駐二堡以免空虛著隨時會商文麟妥爲籌畫賊有撲犯哈密之

說著交隣勒加偵探實力防範不可稍涉疎虞將此由
六百里各諭令知之欽此

逼攻肅州大勝摺

奏爲官軍逼攻肅州大獲勝仗據實馳陳仰祈

聖鑒事竊提督徐占彪赴肅接防正月十一日以前戰
事已據稟馳陳在案嗣據稟報前駐涼馬步正月二十
五六等日陸續拔赴高臺飭步隊兩營一紮河西壩一
紮清水以顧運道派馬隊一營步隊二營於二月初一
日逼紮距肅三十里紅水壩成祿亦以兩營紮臨水初
九日騎賊數百駛至距紅水營盤二三里往來窺探馬
步三營同時出擊賊撥馬疾走初十日騎賊千餘向營

猛撲官軍以馬隊居中步隊分列左右鎗礮環施賊殊死鬪自辰迄午官軍分三面各結方陣合力逼進賊始敗退追十餘里斃悍賊數十名內有執旗賊首一名二十九日探有騎賊向東南出掠追之不及三十日各營分伏全家灣東南十餘里截其歸路賊亦偵知繞路回竄追及全家灣賊列隊抗拒戰歷兩時官軍愈戰愈奮賊不能當紛紛敗退追至河山子復回旗死拒官軍鼓勇直前賊復敗竄回城三月十五日零賊攻臨水對河民堡騎賊爲援官軍擊之獲勝擒斬數十名十六日賊

攻老鸛堡屯莊兵至賊遁躡追及城城逆出馬步千餘
亦經官軍擊敗探報逆首馬四議糾死黨爲背城之戰
徐占彪卽輕騎率隊馳赴前敵二十一日飭步隊四營
分伏距城十里亂古墩樹林中飭右營馬隊列其東南
防援賊自率馬隊以圖勇爲導會同署安肅道何元普
由南河沿繞羅家莊抵南關濠外誘敵賊啟東南兩門
出紅白旗馬步逆眾巡前迎拒步賊趨伏濠邊渠內意
俟官軍逼近突起乘之徐占彪且戰且退賊蜂擁跟追
將至亂古墩伏兵分路突起徐占彪麾軍夾擊賊不能

支返奔及濠遂憑險死拒父子鎗施放如雨官軍奮威
衝壓鎗矛排進斃悍賊甚衆城中復出藍旂綠旂花旗
悍賊三路來援官軍躍渠直進縱橫決盪連環施放洋
鎗及劈山礮雜以刀矛斃賊極多適朱家賊堡亦出賊
來援徐占彪預飭正營馬隊勇丁兩哨堵其莊口斃賊
數十名立將外圍攻破賊不能出逆首馬四見事急帶
黃旗死黨由東南兩門蜂擁來援何元普飭臣宗棠親
軍破隊參將蕭蘭玉把總李道修等向賊叢中連放開
花大礮子落之處人馬紛倒馬四因坐馬傷蹶翻跌下

地徐占彪所部正營營官徐春先驟馬向前擬生擒之
忽右膊爲飛子所中馬四乘間逸去官軍及團眾爭先
掩殺賊大敗回城陝回馬長順率紅黃旂馬賊下餘由
南山一帶往來衝突徐占彪令右營營官齊懷松結陣
禦之副將桂錫楨由臨水遵調率所部馬隊三營馳至
助戰成祿所部副都統明春署南州鎮王子龍等乘勝
繼進賊愈不支爭趨入城自相踐踏官軍追抵門廂賊
急拽浮橋閉門死拒其不及入城者陷投泥淖悉爲官
軍戮斃是役也鏖戰四時之久斃賊實數約六七百名

受傷者約千餘人官軍弁丁陣亡者三十五員名受傷者亦二百有奇蓋血戰也二十三四等日訊據被襲難民供稱是役悍賊死黨殺戮羶斃及帶傷垂斃者不知其數城中巷哭該逆洵懼異常馬長順先擬赴西甯求撫至是以未得先往羣相詬訾徐占彪所部回勇頭目安杰入城詞知備實以賊中情形具告無異詞也臣維肅城逆回以城堅黨悍負固有年迄未大受懲創徐占彪進兵後連戰皆捷茲復逼城痛剿大獲勝仗洵足禔逆魄而快人心此次最爲出力將弁合無仰懇

天恩准 臣擇尤保獎以示鼓勵應發陣亡養卹銀兩已
分飭陝甘兩軍需局按數籌解陣亡之都司賀洪山千
總蔡樹海周開基把總童法雲潘文揚黃迎春張萬發
外委魏洪勛周廷貴王興泰高鳳陽相應請

旨勅部各照官階從優議卹以慰忠魂除批飭該提督
乘此聲威迅圖攻拔堅城速殲逆首外所有官軍進攻
肅巢大獲勝仗緣由謹由驛具

奏伏乞

皇太后

皇上聖鑒訓示謹

奏
同治十一年四月三十日

北路零匪殲滅殆盡摺

奏爲北路零匪肆竄經官軍節次截剿獲勝殲滅殆盡
謹擬分別辦理以勵軍心恭摺馳陳仰祈

聖鑒事竊甘南北路逆回狗齒牙卽楊繼芳馬才棕李
萬海各起向匪攬固東西兩山嗣因官軍接捕甚急竄
歸河州本年正月以後河回求撫該逆等以無地可容
仍偷竄北路爲踪死計臣聞報飛飭陝西提督雷正綰

提督蕭章開左日升道員魏光燾各軍嚴密剿捕正月二十八日雷正綰所部副將趙連科偵知羅家胡同有步賊劫掠趙隊趣之斃匪數十名生擒李四箇子等十二名訊係陝西馬生彥股眾由河州與狗齒牙各起同時出竄者二月初三日騎賊數百竄黃蒿灣雷正綰檄隊兜剿初七日副將李積慶襲賊於元套子賊驚起挺門弁勇猛進斬悍賊三十餘名餘眾鼠竄初八夜狗逆攻馬家河堡駐堡哨弁嚴守却之平明賊東竄總兵易元壽設伏丁家溝賊至伏起截殺十餘名追抵護書溝

另股步賊出洶河口來援敗賊亦回戈力鬥易元壽身受矛傷馬亦傷蹶乃裹創易馬以戰總兵金品勝分隊抄擊賊復敗走追殪數十名十一日總兵鄧林楓邀擊於康家灣十三日左日升截殺於魏家地坑內頗有斬獲賊向花定一帶狂竄十八日犯定邊縣城防營出擊遊擊秦正明守備馮憲章歿於陣署定邊副將王雲平率兵勇繼進賊始退十九日副將李萬盛劉文彩接餉還定邊糧蹙追是夜襲賊於柳樹嶺斃十餘名二十日延綏總鎮劉厚基派隊赴定換防行至安邊三里灘倉

卒遇賊參將銜遊擊劉秀維匹馬陷陣連殪數名被賊攢刺力竭陣亡安邊防營踵至賊乃西遁老湘軍提督湯彥和聞警赴援二十二日甫抵定邊賊已竄近湯彥和率隊截擊賊不虞老湘軍之迅至也駭而奔猛追四十餘里斬馘四十餘名擒二名二十五日追及於左家園賊又遁三十日提督蕭元亨調賊駐紅柳溝乘夜馳往斬三十餘名署延榆綏道成定康派所部提督彭緒所二十四日擊賊於定邊境獲勝二十八日賊匿郭家寨迨東知縣饒兆麟擊之二十九日圍賊於黑梁子

逆目馬小五一股全數殄滅三月初二日彭緒所在高
家離擊賊亦有擒斬初四日賊仍竄定邊湯彥和追及
狗逆騎賊約二百瞥見旗幟卽狂奔猛追四十餘里斬
馘十餘名賊分兩股逃逸一南竄一奔磚井湯彥和向
磚井蹣追數日無踪初九日師抵三義士人告以前六
十里廢莊遭賊往往伏匿湯彥和潛師夜起距莊里許
遙見火光分隊抄入賊驚起四竄立斬四十餘名奪騾
馬四十三頭其南竄一股初八日竄洪德城初九日總
兵熊道濱接戰互有殺傷十五日由本鉢鎮越山北竄

左日升追殺十餘名二十四日竄石溝驛二十五日湯
彥和各營截之新東坡斃賊二十餘名二十六日雷正
綰飭易元壽截之長流水賊潰圍出追至燕子川沿途
斃賊二十餘名生擒十一名四月初二日參將雷天恩
率馬隊馳抵苦脉井賊憑隘死拒雷天恩下馬力戰副
將郎永清以精騎襲其後賊不能支奪路竄走逐北約
五十里斃悍賊四五十名盡奪其馬生擒四名餘賊滾
溝而逸擒賊供稱狗逆及馬二利木所騎之馬皆官軍
所得追急時該逆脫衣落荒而竄未知已否伏誅趙連

科亦於是日追賊於長峪河賊結隊疾行已殲落後賊數名正躡追間賊拚死反鬥趙連科左手受刀傷四指均墜藍翎千總周保泰陣亡賊亦負創向北草原竄去初五日郎永清在高台堡截殺四五十名餘眾潰散此四月初五日以前各軍剿辦北路零匪之實在情形也臣維此起竄賊數本無多然皆百戰之餘熟諳地勢亡命鋌走正檄飭各防營確探痛剿適欽奉四月初三日上諭邵亨豫奏陝邊近日撫剿情形其狗齒牙一股著左宗棠穆圖善飭令雷正綰等督軍痛剿迅殲醜類等

因欽此當經恭錄咨行雷正綰等欽遵辦理現據各軍稟報窮追痛剿殲除殆盡漏逸無多以戰事論雷正綰蕭章開所部最爲出力成定康所部次之在事出力員弁勇丁合無仰懇

天恩准臣擇尤保獎以示鼓勵遑擊秦正明劉秀維守備洪憲章千總周保泰力戰捐軀併乞

飭部照陣亡例各按官階議給卹典左日升所駐汛地疊經竄賊擾及未能實力截剿王雲孚熊道濱均剿匪不力相應請

旨將提督左日升總兵熊道濱署定邊營副將王雲李
摘去頂翎以示薄懲而觀後效仍嚴飭各軍分道搜捕
淨絕萌孽以靖地方所有北路剿匪情形及分別辦理
緣由謹專摺具陳伏乞

皇太后

皇上聖鑒訓示施行謹

奏

同治十一年四月三十日

剿辦甘南零匪情形片

再鞏秦階一帶山谷阻深向爲土匪游勇出沒之所

分飭馬步諸營扼要駐紮探蹤雕剿擒斬頗多正月二十一日總兵尤成章王聲楊參將馮柱增各率所部分途追賊於西和縣境之雪水河賊敗踞山峽廢堡負隅死抗尤成章等下馬率隊猛登奮擊斃賊二三百名生擒十一名是日另股逆騎百餘闖入階州屬白馬關該署州判羅映霄先期會同副將楊隆昌赴白楊灘接捕另股踞賊二十三日聞警馳回賊已退竄署把總周德身受矛傷幕友留浙補用知縣李銓萼湖北補用縣丞郭怡副將孫萬榮同時遇害二十九日王聲楊率隊至

崖城馬鞍山堡逆騎屬至遂依山列陣俟賊竄近火器
齊發賊負創返走仍踞中川王聲揚料賊回竄必由杜
家堡竄夜踰山設伏二月初一日賊分其半護犂畜在
前餘分三路在後王聲揚與從九金森從山腰突起憑
山下擊賊棄所掠牲畜狂竄官軍躡追奮擊殲賊百餘
名初八九日零騎竄向略陽界另股犯太石山守備李
宏珍擊走之初十夜賊襲階州小關遊擊胡彪憑卡轟
擊凌晨賊退探知徑竄大關胡彪率隊赴援與守備周
正秋夾擊獲勝十二夜竄范家河經民團擊退是日王

聲楊擊賊禮縣屬上方坪地方陣斬十餘名生擒二名
十八日賊夜竄拋沙河提督殷華廷副將強鳳岐截擊
敗之二十二日殷華廷強鳳岐會同漢中鎮李輝武所
部總兵鄧貴華副將劉楚華剿賊康家灣賊分股抗拒
經殷華廷等擊卻追抵詹家山陣斬及滾崖死者甚眾
三月十三日賊踞西禮交界鐵鎖橋總兵張養吾副將
常遠藻王韓楊會隊疾往賊憑險死拒官軍鎗矛排進
賊奔潰追殺三十餘里斃賊六七十名救出難民男婦
二百名生擒六名十四日賊犯略陽屬郭家壩李輝武

所部提督王照南總兵蕭德林追之抵花厰溝鏖戰逾時斬悍賊數十名賊敗遁又追殺多名生擒十名二十二日賊竄階州屬境楊隆昌戰於馬家河斃匪六七十名殪其衝鋒賊目一名餘賊竄逸二十四日追及之於麻巖子陣斬數十名追殺及墮巖死者甚眾署階州直隸州知州洪惟善慮尾追莫及檄楊隆昌卽取道望子關相機截擊二十八日偵賊竄長壩乘夜襲之斬斃十名擒五名訊據逃出難民供稱此起回逆僅二三百名雜以游勇土匪逆目米相公已在麻巖子經官軍擊斃

馬三亦經捕獲正法提督田連考殷華廷聞報馳至賊
丁合股聚踞木瓜嶺四月初七日田連考等直搗賊巢
賊盡棄輜重滾溝越嶺而逃田連考奮威躡剿擒斬百
餘名殷華廷亦有斬獲據各該營先後稟報前來臣維
甘南階成一帶素爲藏奸之所此次疊經懲創黨夥涸
零不能成股仍飭各將領聯絡一氣探蹤搜剿以靖地
方厯次陣亡副將朱桂樑參將陳華彩守備梁宗亮千
總劉啟運劉荔春李高魁劉志忠楊澍恩把總李明道
相應請

旨飭部照例議卹以慰忠魂白馬關被匪闖入該文武
有應得之咎惟署白馬關州判羅映霽平時勤於民事
此次因捕賊遠出致汛地疏防旋即收復擬懇

天恩免其置議把總周德應請革職不准留營殉難幕
友留浙補用知縣李舒寧湖北補用縣丞郭怡副將孫
萬榮併乞

交部議卹是否有當謹附片具陳伏乞

聖鑒謹

奏 同治十一年四月三十日

軍機大臣 字寄同治十一年五月初十日奉

上諭左宗棠穆圖善奏官軍偪攻肅州大獲勝仗左宗棠奏截剿北路零匪殲滅殆盡暨階州白馬關被匪闌人旋經擊退各摺片覽奏均悉肅州陽逆經徐占彪督軍痛剿連戰皆捷殺斃悍賊死黨甚多城賊恟懼左宗棠等卽飭令該提督乘此聲威迅拔堅城盡殲醜類惟該逆負固有年仍當穩慎進攻不可稍涉大意此次出力各員准由左宗棠擇九保獎陣亡之都司賀洪山千總蔡樹海周開基把總董法雲潘文揚黃迎春張萬發

外委魏洪勛周廷貴王興泰高鳳陽均著交部各照官階從優議卹甘南北路零匪經官軍節次截剿殲滅殆盡惟狗齒牙及馬二利木尙在脫逃該逆皆百戰之餘熟諳地勢亡命竄走自在意中左宗棠等仍當檄飭各防營分道搜捕務將狗齒牙等逆悉數弋獲淨絕根株雷正綰蕭章開成定康所部出力各員准左宗棠擇尤保獎以示鼓勵遊擊秦正明劉秀維守備馮憲章千總周保泰力戰捐軀均著交部各照官階從優議卹提督左宗升總兵熊道濱署定邊營副將主雲孚剿賊不能

得力均著摘去翎頂以示薄懲甘南階成一帶竄匪闖入白馬關經官軍截剿竄逸餘黨無多該督等仍嚴飭各將領聯絡一氣探蹤搜剿以靖地方歷次陣亡副將朱桂樑參將陳華彩守備梁宗亮千總劉啟運鄧荔春李高魁劉志忠楊樹恩把總李明道均著交部照例議卹署白馬關州判羅映霄疏防汛地被匪闖入惟因捕賊遠出聞信卽將該關收復著加恩免其置議把總周德著卽行革職不准留營殉難之知縣李舒萼縣丞郭怡副將孫萬榮均著交部議卹將此由六百里各諭令

知之欽此

整飭甘南潰軍片

再甘南潰軍將弁除田大勝等六名已遵

旨斬決外尙有隨摺聲明嚴拿正法之周道欽王勇韓
祿三名據前布政使司王德榜稟報四月初一日由番
地緝獲王勇韓祿二名均已正法惟周道欽一犯畏罪
遠逃已通飭嚴拿其潰退各步營據王德榜會同降補
參將楊世俊先後稟報遣撤弁勇二千八百五十五員
名計籍隸各省者六百五十五員名量給行糧分起押

送出境查照各該原籍分別由駐鄂糧台及駐陝軍需局發給川資籍隸本省者給予籽種概飭歸農存營弁勇一律精壯仍飭加意訓練務成勁旅護運各軍亦飭提督梅開泰等汰弱留強不得以未經挫折稍存姑息三品卿銜道員劉錦棠據報挑選凱旅精壯勇夫三千六百餘名二月十三日由湘鄉起程三月初三日甫抵漢口沂流稍緩五月間計可入甘臣飭其抵平涼後輕騎前來面商換撤事宜及分駐地方斟酌調遣並飭陝西候補直隸州知州龍錫慶於所部義勇四營中挑足

兩營由陝西北山拔赴安定擇要扼紮臣維同情反復
無常應遵歷次

諭旨嚴防變詐察看情形甘南諸軍經此次整飭漸覺
改觀徵調各營均恪遵紀律尙足振聲威而安反側謹
附片具陳伏乞

聖鑒謹

奏 同治十一年四月三十日

軍機大臣奉

旨知道了欽此

福建甘捐變通辦理片

再准辦理西征糧台兼辦甘捐翰林學士袁保恆咨准
福建總辦甘黔捐局司道咨稱閩省協濟甘餉計自同
治五年十一月起暫截至十一年正月止先後共解過
協餉銀三百零三萬兩又自八年十一月間設局勸辦
甘捐截至上年六月撤局止共捐銀十八萬餘兩米三
十三萬餘石是閩省之籌餉辦捐實已不遺餘力現奉
部咨飭催積欠舊餉爲數較巨實屬無從籌補除按月
應解銀五萬兩仍照數籌解外擬於此次勸辦甘黔捐

輸應解四成半銀內以一半作抵舊欠甘餉其餘一半
仍歸捐輸造報量爲變通辦理於捐輸既無窒碍而欠
餉亦不至虛懸等因商請具

奏前來並據閩局司道呈同前因臣維閩省協濟甘餉
實屬不遺餘力此次變通捐輸以一半作抵舊欠爲維
持大局起見相應請

旨飭部立案俾清積欠而裨軍餉謹附片具陳伏冀
聖鑒訓示施行謹

奏
同治十一年四月三十日

軍機大臣奉

旨戶部知道欽此

成祿難期得力片

再烏魯木齊提督成祿屢奉

諭旨飭令出關遷延至今尙無出關確耗計自進兵西
陲於今七載虛糜至艱之餉奚止數十萬而戰績無聞
中間僅報收復肅州而肅州旋被賊踞成祿仍避賊甘
肅之高台肅回北窺烏里雅蘇台兼出關擾掠安西所
屬成祿不能制也陝回由西甯北擾甘涼與肅回合股

成祿不能制也陝回馮均幅實心就撫成祿受之不肯
資以兵力致馮均幅爲馬四所害又不能撫輯馮均幅
餘黨致馬四得以重賂啖之收其悍黨而其弟馮均貴
等遂引其餘衆南附河州成祿且馳檄甘涼各軍沿途
截殺是絕其反正之路也陝回馬長順素稱狡悍常其
由河西漏網西竄肅州出嘉峪關搜掠安西所屬狂獫
候張比聞徐占彪所部西進急返肅城輸款於成祿成
祿與徐占彪請受其撫馬長順又通款於徐占彪請爲
肅城內應忽成祿將護送寶璽之陝回二十餘名一夜

復盡而馬長順遂疑懼不敢回西甯就撫現復與馬四
合勢死抗官軍辦回之道不外剿撫兼施然欲治其詐
先示以信欲洞其情先釋其懼不易之理竇型信有罪
友護送出城之陝回果何罪乎如是而言撫不可謂信
如是而言剿不可謂威據稱欲會合徐占彪共克肅州
而遇事不與相商且故意牽制阻撓之克復之功又將
何望成祿一軍本有專餉臣無從預聞然念邊塞行軍
之苦從未嘗有所計較亦以公家之財贍公家之軍固
無庸其畛域也頻年以來成祿截留省糧爲數甚鉅上

年欽遵

諭旨派徐占彪赴肅州臣飭署甘涼道蕭宗幹等採軍
輝購運需時飭沿途州縣先以省糧供濟隨後買補以
慮成祿或有違言並飭蕭宗幹於所屬代爲採糧以資
兼顧所以爲成祿計者不爲不周徐占彪師過張掖高
台該各縣預碾倉糧接濟成祿

奏撤署高台知縣徐應魁而以私賣倉糧罪之並參西
路轉運署涼州知府李守愚不應緘致各縣預爲徐軍
籌辦行糧實則成祿所截省糧已足敷該軍數月之食

各屬分其餘糧以供徐軍數既無多又可隨時採買填補於事理原無不合而顧斷斷如此蕭宗幹代成祿於高台金塔等處定買軍糧五千石原約發銀收糧成祿祇發銀五千兩收糧二千石有奇餘銀不發翻

奏蕭宗幹虛張其數糧尙無著以此上瀆

宸聰亦出清常意之外成祿一軍十二營現存糧數不過五六萬而尙多冗雜前由高台發兩營赴肅州拉運車二百餘兩半載婦女小孩人所共見久駐高台蓄養戲班相爲娛宴上年並遣人赴都接取第三妾來高台

荒邊遠塞竟視爲安樂行窩顧安望其長驅塞外一徇
公家之急乎西路用兵餉事糧事轉運三者艱窘異常
成祿一軍截留省糧加以派捐人數少而軍食充道路
近而轉運省故常有數月之儲其各處協餉多寡臣雖
無從查悉然厯詢自涼甘一帶來者僉謂上年解到協
款二十餘萬兩存儲尙多如果決計出關實無不給之
慮且奉

旨飭催已數月矣此數月中出關固需裹糧以趨不出
關亦豈能枵腹而坐與其坐食而徒糜至艱之餉孰如

遠行而就關外之糧且近又截留奉撥景廉軍餉十萬
雨是歸非不足餉非不裕也乃不乘此時急謀出關而
仍指詞談延日復一日過此以往常有可指之餉不竭
之糧任其虛糜乎臣與成祿素未謀面每聞其虛報勝
仗心竊憂之近詳察其舉動一切謬率乖張實難枚舉
竊謂如成祿者此時遷延不進固失事機卽令勉強出
關終難期其振作有爲克當一路臣不敢徇隱自干咎
戾應否

簡派知兵大員接統該軍並歸景廉節制調遣以一事

權而收餉節兵精實效之處出自

聖裁謹據實附片陳明伏乞

聖鑒訓示施行謹

奏同治十一年四月三十日

恪靖奏稿續編卷四十四目錄

收復河州安插陝回辦理善後事宜摺

肅州官軍獲勝並甘涼防軍剿賊情形摺

甘北現無成起逆賊擾掠片

甘南肅清情形片

新募湘軍來甘舊勇回湘片

收復河州安插陝回辦理善後事宜摺

奏爲收復河州城池分起安插陝回辦理善後事宜恭摺陳仰祈

聖鑒事竊維河州土回馬占鰲馬尕大等瀝誠求撫呈繳馬匹鎗礮刀矛等疊次馳報嗣據該回目自限分途按戶搜繳一月完竣復繳馬五百餘匹鎗械稱是出具並無隱匿存留切結計先後共呈繳馬匹已四千有奇鎗矛一萬四千有奇候補按察使陳湜委員同時分起赴各鄉按村勘驗無異方馬占鰲之自限分途搜繳

馬械也各遣子並偕各回目馬承瑞等十二人赴安定軍前獻馬五十匹具稟悔罪投誠臣宗棠宣布

朝廷威德諭以死生禍福聽其自取比仍縱令歸巢催繳馬械該回民畏疑益釋誓爲良民至是具報馬械盡繳乃明白曉示准其就撫也辦撫之道以編審戶口爲要編審戶口以遷徙客回安輯土回爲要河州境周五六百里回多漢少雜以番衆同治元年變亂以來陝回多避居其中自陝境肅清金積塢蕩固原東西山相繼平定所有各處倡亂之回多寄孥其間以避誅戮此客

回之應遷徙者也其本籍漢民有爲河回脅制甘爲役
使名爲隨教以圖保全者有仇隙已深逃至岷洮狄道
充當勇丁而親屬仍留河境者宜分別拔出以免釁端
此本境漢民之應遷徙者也其外來漢民有因陝回裹
脅而隨其同竄河境者有被河回裹脅而認爲義子齒
諸奴僕者應逐一勒令交出護送原籍以別種類而資
完聚此外來漢民之應遷徙者也撫事既定乃次第圖
之顧謀遷徙必先定安插之地安插之地回漢各有攸
宜漢民宜安插狄道金縣安定會甯一帶凡近城驛漢

民聚積之處宜也回民則近城驛非所宜近漢莊非所
宜並聚一處非所宜從前安插陝回如化平廳平涼縣
大岔溝及北原各處丁口已一萬數千既未可多所附
益又此次安插回民有籍隸陝回者有隸甘肅者當其
并力抗拒官軍固無彼此之分也一旦繳馬械就撫還
爲齊民則甫被新恩旋尋舊怨不但陝回與甘回氣類
攸分卽陝回與陝回甘回與甘回亦有難并城而居者
以撫局論分起安置渙其羣孤其勢計之得也卽以回
情而論亦非分起安置不可乃預飭安定會甯平涼隆

德靜甯州各牧令覓水草不乏川原相間荒絕無主各地自成片段皆以便安置旋委員分途履勘乃度其地廣狹遷陝回楊文彥一起二百五十三名口於平涼之謝家莊桃家莊遷陝回張代雨一起二百九十一名口於平涼之張家莊曹家莊遷陝回拜崇花一起五百三十七名口於會甯之姚王家曲家口遷陝回馬生彥等一起六百四十三名口於靜甯州隆德縣境之王家下堡劉戴家山遷陝回馬文元一起一百五十七名口於安定之劉家溝遷陝回馬維驤一起七十四名口於安

定之石家坪遷陝回馬振清一起三百六十三名口於安定之好地堂遷甘回安鴻慶一起四十三名於安定之劉家溝遷漢民陳富貴等四百四十七名口於安定之青嵐山遷漢民董永海等一百零八名口於安定之新套河遷漢民水映江一起四百二十八名於安定夏家營防其陝回中親屬有已安置化平廳平涼縣境者漢民中親屬有已流虜隴西狄道州各境者聽其自行拔赴完聚而皆給以賑糧大口每口八兩小口每口五兩其遷出稍晚尙能插種粟糜蕎麥者照所墾地畝給

以籽種其節候已過不及下種者令其盡力耕墾以待
明春所需農器及各器具必不可少者一律酌給惟陝
回馮均祿一起任河州西北二百餘里黃河北岸已於
彼耕墾栽種乞候收穫後遷徙聽候安插而鹽茶固原
回民從前寄居者尙待清查其應遷之漢民亦有求緩
俟收穫者然丁口亦無多矣遷徙安置漸有頭緒乃令
知河州知州潘效蘇赴河州知州新任新授河州鎮總
兵沈玉遂帶所部後路五營赴河鎮任署河州州判米
聯璧赴太子寺分駐任所據潘效蘇稟報五月十三日

到任沈玉遂稟報五月二十四日到任沿途漢回列案
焚香迎送絡繹馬占鰲馬尓大馬永瑞及各回目阿渾
等成跪道旁膜拜感泣並納糧百萬斤備軍食因亂後
空城僅存於關廂建知州官廨暫資辦公沈玉遂五營
列帳城中分飭所部四營各軍由城關外延紮甯河一
帶記名提督張仲春領所部宗岳六營進駐太子寺一
帶前據甯河後接七甲集等處記名提督陳廣發總兵
凌春臺以所部良輔平西等營駐三甲集前接七甲集
後接康家崖洮河西崖記名提督王衍慶所部左路五

營及鎮西忠營兩營仍駐康家崖西通三家集北連沙
泥站南達狄道州東達跼灘以抵安定提督銜記名總
兵張福齊所部六營由沙泥站分布北由阿干鎮以達
省城南出沙畛接康家崖分布之營前福建布政使王
德榜所部定西等營仍駐狄道西北接甯河太子寺三
川集各營南接岷洮各營東接鞏秦所屬各營河州撫
局雖定而諸路連絡布置仍未稍疏也惟西北二百餘
里循化同知所轄番回雜處毘連西甯卽前史所稱世
谷渾地今爲撒拉回巢地險民悍爲甘肅邊患久矣亂

後回番自相殘殺人物彫耗文武不能履任遂以化外
置之茲因河州撫定撒拉各回亦赴軍前求撫陳湜訓
知逆首狗齒牙卽楊繼芳馬彥濇馬聾子等敗後竄匿
河州地境密諭馬古鼃掩捕馬古鼃陸續將狗齒牙馬
聾子馬彥濇獲解其希圖立功自效之情尙似可信現
籌辦理善後要務如清釐地畝編審保甲分給門牌安
設驛站修葺城垣關隘各事宜正在次第辦理而今歲
春夏之交雨澤早降夏收最稔秋稼亦十豐登土民僉
稱實十數年來所未見尤爲意外之幸上忙已報開徵

民間輸將亦覺踴躍察看情形人情大定各路大致又漸次肅清臣宗棠料理及畢即可進駐省垣矣所有河州撫定收復城池辦理善後實在情形謹合詞恭摺馳陳伏乞

皇太后

皇上聖鑒訓示施行謹

奏

同治十一年六月二十五日

肅州官軍獲勝並甘涼防軍剿賊情形摺

爲官軍逼攻肅州疊獲勝仗并甘涼防軍截剿援賊現

籌勦辦情形恭摺仰祈

聖鑒事竊肅州回逆自本年三月二十一日受創後
在城外及北崖頭塔爾灣等處增設堅卡爲負固計四
月二十四五兩日副將桂錫楨逼卡誘敵見大卡以外
環築小卡賊縮匿不出兩次僅斃賊三十餘名生擒八
名提督徐古彪飭所部滾營進逼二十七日參將齊懷
松移紮中河橋甫定遽率百隊百騎覘賊將近塔爾灣
見各卡外豐草腴華牲畜遍野卽麾軍迅進殲收馬賊
十餘名而奪其馬卡賊出援齊懷松已整隊護所獲牲

畜而返二十九日復率輕騎歷繞城西賊驅牲畜飲於
阿驢馬蹙之奪獲甚夥聞城上鐘聲旋起城中援賊爭
出乃整隊歸賊不敢逼五月初一日桂錫楨率馬步疾
抵城干城卡各出馬步賊數百列陣迎拒桂錫楨以步
隊居中馬隊分兩路包剿奮威齊進賊奔趁勢猛追直
抵東關口關閉不敢敗賊競逃入卡桂錫楨麾軍逼攻
立破大卡一座賊墮濠死者頗多獲戰馬三十六匹生
擒馬元等五名斬以徇初三日桂錫楨以一營預伏十
里墩率三四兩起馬隊在肅州東角往來驅騁賊由東

關突出馬步千餘名奮前猛撲官軍且戰且走誘近十里東墩伏兵繞由賊後突起桂錫楨回身夾擊賊遂奔潰追斬百餘名生擒十四名奪賊馬十八匹訊據獲賊及逃出難民合稱馬四分向關外及西甯各回族求援續有新出難民告知有關外賊目魁頭老四帶纏頭馬步賊三千餘人入城助守提督黃虎臣率軍偵之列隊河灘見城中花紅黑白各旗魚貫而出知爲賊之舊隊大黑旂繼出約衆二千餘計係關外新賊均排立城邊就渠沿環施鎗礮誘之不前黃虎臣繞北路回營奪牲

畜數十頭徐占彪以賊情狡詐必賺之遠出始克痛剿
密飭歸化營回勇暗約馬四十八日出隊當作內應繞
旗爲號是日徐占彪親率精銳乘夜潛出伏城西南老
馬堡黎明先以步隊兩營逼城而陣賊衆爭出官軍且
戰且退賊仍疑却不前忽見歸化營在亂古墩上繞旂
數轉喜內應已確大股突出桂錫楨時伏深林中俟賊
過甫半橫截而出賊見伏兵無多尙分隊抵禦歸化營
迎頭猛擊官軍繼之徐占彪由老馬堡分三路馳至逕
衝賊隊縱橫決盪賊屍枕藉賊分兩股一趨城關一奔

入朱家堡徐占彪軍攻堡鎗斃守賊甚衆賊殊死拒撤
隊誘之城賊復飛騎來援徐占彪縱擊斬馘多名將賊
擊退並搜殺麥地伏賊數十名是役約斃賊數百所奪
馬械稱是官軍亦有傷亡二十日黃虎臣以兩營移紮
三仙洞距賊僅八里二十一日徐占彪繞城巡視賊環
城列隊徐占彪折至塔爾灣賊出隊護牲畜殺賊十餘
名此五月二十一日以前徐占彪進攻肅逆屢獲勝仗
之情形也五月初五日有馬賊數百竄擾撫彝境署甘
涼道蕭宗幹聞報會商署甘肅提督楊占鰲撥隊截勦

初六日楊占鰲飭提督張慶雲率隊將抵撫綏賊折竄東樂返嚮追之賊搶掠牲畜駛赴山丹張慶雲蹣踪追擊初十日在紅寺湖小有斬獲十一日有另股馬賊竄鎮番署鎮番營遊擊李效現副將王禮和會擊賊於唐家寨斃匪三四十名殲執族賊目二名十二日又追及於爛泥溝賊不戰而走追斬十餘名是日張慶雲追抵黑城有股匪自扁都口竄出與前股合約共二千三百騎張慶雲扼之駝嶺山賊竄入口十六日賊攻大馬營署永固協副將扎拉芬與張慶雲會隊援之十八日

戰於周家莊官軍被賊圍截傷亡頗多尙未據楊占鰲
續報據署涼州府知府李守愚會報永昌永泉寺一帶
時有賊踪署涼州鎮總兵王仁和報派隊在高古城擊
賊獲勝是甘涼所報賊踪均由西甯竄出也前據駐威
遠之西甯鎮總兵黃武賢報陝回畢大才馬五九等糾
眾二千援肅由大通北原竄出禹得彥白彥虎等悍匪
多在其內以時地計之卽此股無疑據道員馮邦棟稟
報西甯土回自上年首逆馬尒三死後兇焰漸銷現在
回目馬永福頗明大義馮邦棟到碾伯後馬永福卽率

西甯咪喇溝西馬營各處回目傾誠求撫呈繳馬匹鎗礮各數百據稱陝回禹得彥曰彥虎崔三等股佔據大小南川尙未就撫遷巢慮其反噬不得不留各馬步防之一俟陝回了事卽當悉數呈繳不敢藏匿自誤陝回惟崔三求撫甚切其禹白等逆則自知稔惡有年疑畏殊甚據撫回陳林等稱該逆等私議如官軍速進當竄蜀竄滇以延殘喘崔三不能制也逆目畢大才等由大通北竄赴肅城首逆馬四之援而禹白崔等三逆仍駐大小南川未嘗同行也近又遣人詣馮邦棟求撫繳馬

械各數十其借此以緩官軍之攻可知惟官軍進攻亦有未能速者由蘭州平番歷碾伯以抵西甯路將千里輓運甚艱若因糧彼間非七月初旬不可臣等飭馮邦棟始諭其悉繳馬械勿遽絕之一面飭馬永福馬占熬先將陝回去路遮截一面檄記名提督何作霖統領所部步隊六營益以馬隊兩營由康家崖拔行前赴碾伯駐紮檄三品鄉衛記名道劉錦棠率步隊新舊四營馬隊兩起由平涼拔行臣宗棠益調陝西補用直隸州知州龍錫慶率所部綏定兩營步隊會師碾伯繼進計何

作驍馬步入營此時已行抵平番劉錦棠七月初四五
日可抵蘭州比會師礪伯正當新糧收穫之時軍食無
虞缺乏區區之愚以陝回首逆及各逆家口均在大小
南川掘師指西甯攻所必救畢大才等或當回援老巢
官軍力戰破之然後分別勦撫可速戎機也至肅州城
堅濠深賊中積糧不支年許近於重壕外增砌賊卡死
守不出又購關外援賊前來徐占彪雖力圖攻拔恐亦
遽難得手據徐占彪密稟擬先刈近城四十里麥豆誘
賊出擊相機圖之臣等已飭其穩慎辦理候西甯事畢

再籌會剿並多發攻具助之謹將籌辦西路情形一併據實陳明伏乞

皇太后

皇上聖鑒訓示謹

奏 同治十一年六月二十五日

軍機大臣 字寄同治十一年七月初七日奉

上諭左宗棠穆圖善奏收復河州城池辦理善後事宜肅州官軍獲勝並甘涼防軍截剿援賊情形邵亨豫奏疊剿竄陝零匪肅清各摺覽奏均悉河州土匪馬占鰲

馬尒大等瀝誠求撫經左宗棠等宣布朝廷威德責令
盡繳馬械准其投誠一面編審戶口將遷徙客回安輯
土回各事次第籌辦又於安定會甯平涼隆德靜甯各
屬度地廣狹分起安插陝回及漢民之無依者並皆賑
以賑糧所籌均合機宜河州文武員弁現已分駐任所
卽著左宗棠督飭沈玉遂等加意撫循俾悔過自新之
人咸知感愧庶幾日久相安不至再生反側其太子寺
等處要隘並著飭令張仲春等軍照常聯絡布置勿稍
疏懈撤回目畏威求撫並著該大臣相度機宜一併

妥爲籌辦西甯回目馬永福乞降而陝回禹得彥白彥
虎等自知稔惡疑畏殊深且有官軍速進卽當竄蜀竄
滇以延殘喘之議正不可不嚴爲之防左宗棠現飭馮
邦棟一面諭令悉繳馬械一面密飭降回截其去路並
分派各軍會師碾伯進規大小南川老巢所籌深協兵
機卽著督飭官軍密速剿捕毋令他竄肅州城堅壕深
徐占彪一軍雖屢攻獲勝仍當飭令穩慎進取不可稍
涉疏虞竄陝零匪經陝西各防軍截剿追至靜邊保安
所屬該逆竄向草地而去邵亨豫督飭譚仁芳等扼要

駐紮嚴密布置以清疆圉北山一路開墾漸多民食稍資接濟並著該署撫督率牧令勸求民瘼加意撫綏以副軫念災黎至意將此由六百里各諭令知之欽此

甘北現無成起逆賊擾掠片

再狗齒牙卽楊繼芳等逆經陳湜密飭河州撫回馬占鰲擒獻訊辦其死黨虎滿喇前經鹽茶廳城防回勇哨長楊馥廷護解雷正綰營訊辦又中衛縣長流水新撫回民金生智獲逆目黑卯廖馬二利木等解總兵馮南彬營訊辦其馬才棕一犯據獲賊供已於上年轟斃此

外各起零回經靈州鹽茶固原平涼隆德靜甯會甯安定靜遠各防營掩捕追剿擒斬多名特其中有無著名賊目非獲賊訛明及撫回指認不能悉也察看近日情形北路自甯靈鹽茶一帶至蘭州已無成起逆賊擾掠之事惟敗殘餘匪多或數十騎少則十數騎數騎竄伏空山伺便突出見有官軍則竄逸無跡雖於大局無害而千餘里防軍林立未得解嚴蓋土著之回路徑熟悉賊數既少踪跡易藏官軍臨之如狼捕鼠較之剿辦犬股翻形契力也現飭各將領挑派哨隊分伏僻處遠近

民堡相機圖之冀可早日肅清以紓

慈廬謹附片陳明伏乞

聖鑒謹

奏同治十一年六月二十五日

軍機大臣奉

旨知道了欽此

甘南肅清情形片

再甘南零匪前經官軍痛剿每恃深山密箐爲逖逃藪
四月十一日提督殷華廷偵賊竄西和之香山自率兩

哨尾追以兩哨繞出山前賊甫至半坡山前隊伍以鎗
炮仰攻賊悉力抵禦殷華廷已率隊度嶺潛出其後賊
遑遽橫逸擒斬頗多餘逆竄白家關殷華廷計賊蹤當
出桃坪十二日冒雨馳往賊已先期逸去十五日聞賊
踞小川子兵至賊又遁二十一日提督蘇家良所部總
兵王銘忠趙得禮擊賊鐵佛寺斬二十餘名獲馬十餘
匹二十二日設伏宗淡溝賊果由溝出截殺十餘名生
擒十四名二十六日升任甘肅提督李輝武所部總兵
鄧貴華副將劉楚華蹣賊於李家溝賊憑險力拒鄧貴

華麾軍衝擊斃悍賊十餘名賊潰走殷華廷踵至亦有
斬獲是日總兵楊德俊搜捕至雪水河馬賊百餘正就
深林休憩官軍奄至立斫斬數名遂北至趙家山賊回
馬力抗楊德俊扼其前別以馬步分路襲其後賊窘甚
悉向深林狂竄盡棄其馬正飭各營分路入箐撥剿瞥
見步賊二百餘循山徑東來楊德俊逕前薄之賊不戰
而退走追至白草垓賊據崑抗拒鏖戰三時官軍鼓勇
齊登賊跳崖死者甚衆兩戰計殺五十餘名賊之跌斃
者無數生擒三名五月十一日賊攻朱家河民堡統領

奇捷各軍降補參將楊世俊聞報馳往賊列隊迎拒飭
馬隊分三路鈔擊賊越山狂竄遊擊張成倫已繞據山
巔截之追騎至斬賊百數十名而還十三日餘賊純遁
秦家河崖谷深阻誘之不出忽有股匪自太石河至與
該逆合乘夜潛逃十八日提督田連考截擊於岳家壩
斃賊三十餘名二十日楊世俊追抵階州譚家壩署階
州知州洪維善飭總兵楊隆昌率寶營自後來擊賊敗
奔南坪山二十二日賊穿林走馬家壩分路埋伏以拒
追者楊世俊飭寶營跟蹤猛追別以馬隊鈔擊伏賊殺

賊極多內有黃旗賊目一名且追且殺踰老灘河至漫
坪田連考又由花馬地方橫哉而出亦有斬馘二十三
日餘賊奔佛八崖楊世俊追及殺賊數十名三十八日
又追及之於禮縣秀山截賊爲兩一奔馬家山一奔包
家山其馬家山一起經田連考邀擊亦回竄包家山合
股西竄二十九日追至曰家關沿途擄斬數十名餘賊
又分竄碧玉河一堤壩等處訛據賊供賊中頭白凡五
一馬麥成一劉三皆陝同一蘇舍立一馬姑九一馬麻
兒皆鹽關土回劉三馬姑九已經陳斬餘尙未知下落

比各軍續報六月初六七日勝仗零匪就撫餘均殄滅
臣維甘南零匪由河州陸續竄出勾結鹽關土回肆出
擾掠官軍至則鼠竄無蹤官軍去則蜂屯如故而地當
隴蜀聯接之區深山密箐土客雜處如四川老林者往
往有之以故賊數無多而兩省不得解嚴者已非一日
自河回就撫該匪無巢可歸防營網羅遍布追軍躡賊
奔馳往復二千餘里戰績雖無足言而將士勞苦亦殊
可念擬擇其尤者酌請獎敘可否出自
天恩所有甘南肅清情形謹附片縷陳伏乞

聖鑒訓示謹

奏

軍機大臣奉

旨知道了欽此

新募湘軍來甘舊勇回湘片

再三品卿銜道員劉錦棠上年告假回籍時原稟募帶
新軍來甘更換所部久征將士俾資休養而均勞逸其
原駐金積各營交提督蕭章開代爲統領一年以來毫
無疏悞茲劉錦棠已募帶湘軍來甘臣與籌商應分撥

步隊三營馬隊兩起交記名提督譚拔萃統赴金積分
駐防剿 臣撥總兵馮南斌所帶正營知州黃立釐所帶
定營併歸統帶以利分布蕭章開卽帶准假舊勇回湘
已各報起程理合附片陳明伏乞

聖鑒謹

奏

軍機大臣奉

旨知道了欽此

惲靖奏稿續編卷四十五日錄

逼攻肅州疊獲全勝摺

中衛一帶截擊竄匪片

後路肅清進駐省城

逼攻肅州連克賊壘摺

逼攻肅州疊獲全勝摺

奏爲官軍逼剿肅州疊獲全勝攻拔塔爾灣堅巢並掃蕩城西壘卡百餘座擒斬著名逆目多名恭摺馳陳仰祈

聖鑒事竊提督徐占彪進攻肅州五月二十一日以前戰狀臣等已於六月二十五日由驛馳陳在案徐占彪周視肅城惟西南地勢居高賊於距城三十里之塔爾灣堅築堡垣環以濠卡連接黃草壩各賊堡與肅城相爲犄角欲規取肅城非先奪塔爾灣堅堡不可維時肅

州城外小麥漸次欲熟而賊仍固匿不出各營連日出隊刈麥以絕賊糧兼以誘賊雖小有斬獲卒未得一痛擊也五月二十七日徐占彪飭駐紮三仙洞之提督黃虎臣每日出隊雷台廟一帶牽制該逆示形於東而親率馬步五營裹帶行糧同署肅州鎮總兵王子龍并調紅水臨水圍丁夜趨塔爾灣飭副將桂錫積率馬隊爲兩路策應抵塔爾灣時天尙未明分所部爲十隊各指一堡攻之賊不意官軍夜至倉卒抗拒官軍已乘閒躍入立破數卡各賊堡正圍抵禦而官軍已徑薄堡根火

器迸注鎗礮雷轟堡中火起守賊奪門四竄自寅至巳
攻克賊堡四座墩卡十九座生擒十餘名塔爾灣堡之
賊出紅白旂來援馬隊擊卻之旋卽閉堡不出徐占彪
揮軍圍攻賊拚死拒守徐占彪就地爲營是夜復分隊
襲破附近墩堡六座其焚墩自竄者又十餘座是日黃
虎臣師抵朱家堡城中以步賊出禦正接戰間突有馬
賊數百束趨三仙洞桂錫楨回軍擊之殺賊數十名而
奪其馬馬步賊均返奔入城二十九日徐占彪調開花
礮連轟塔爾堡謀報城賊出馬步數千分道西馳來援

徐占彪按陣不動靜以待之馬賊數百一近陣前旋卽
縮退徐占彪知其有伏飭提督陳春萬出北路繞伏賊
之後王子龍擊其前賊分投接戰馬隊橫攻之賊敗遁
追抵黃草壩始收隊還三十日飭各團丁分道刈麥以
馬隊由三仙洞往來游駛爲疑兵仍分軍輪攻塔爾堡
晝夜不息六月初一日肅逆又以悍股赴援凡三次悉
經馬隊擊敗陳春萬復乘勝攻獲東大堡生擒賊渠萬
長金自鳴斬之賊益恟懼塔爾堡東焚堡夜遁者蓋以
十數計初二日徐占彪進紮黃草壩督正營歸化等營

圍攻塔爾堡益急是夜軍功回目藍明泰奮威先登守
備徐春先繼之立將塔爾堡攻克守賊鮮得免者獲千
斤大礮一尊鎗械數百件牲畜稱是訛據活賊供稱二
十九日之戰口外回目萬長赤斤老二千長冶老四已
經官軍陣斬初三日徐春先攻開文殊山前堡二座其
餘七座亦以夜遁塔爾灣以上賊壘空矣初四日各營
分攻黃草壩三堡未下初五日徐占彪繞堡東築營絕
其糧道連破賊墩數座賊知不敵開堡競逃斬馘無算
復乘勝克小堡二十餘座於是肅城西南墩堡百餘座

均一律蕩平各營合紮沙子壩距城僅三里初六日大南門擁出賊衆五六千均穿白衣紮白巾加縛黃紙前斜排兩行中排方營後列散隊蓋賊中所謂喪門陣也既成列殺一婦人一狗於陣前似爲壓勝之術者旋狂譟齊撲官軍營壘徐占彪令各營勿出俟賊之前隊盡過中隊徑薄陣前中營鼓聲起各營奮威衝出賊殊死鬥參將蕭蘭玉以開花礮向賊叢測進轟擊桂錫楨率馬隊徑穿賊陣賊隊大亂徐占彪揮軍乘之躡踪追殺尸橫遍野直至城根始行收隊奪旗職鎗械多件獲

匪供種馬四之弟馬六元帥額角中礮子衆賊搶回城中是日戰斃關內外逆回兇渠數名馬步悍賊無數蓋徐占彪攻肅第一惡戰也賊之排喪門陣以出也誓決死戰迨二段方陣撲近營前時方晴明將弁均奉令按隊挺刃以待忽西北雷聲大震黑雲飛壓賊陣雷雨交作各營聞鼓聲奮躍衝入賊陣賊方驚悸之餘繩藥盡溼官軍所用多洋鎗不畏風雨人人喜荷神助以故縱橫盪決所向披靡然將弁之亡傷者亦二十餘員賊之兇悍亦畧可見矣初八日賊踞州城南門外枯樹堡噉

賊眾伏麥地向營開放又子鎗官軍分路衝截斃賊數十賊收回枯樹堡初九日賊數千由南稍門出分駐香莊大小四堡城中旋出賊千餘仍伏麥地向營放又子鎗比官軍出隊分擊伏賊搜斬十餘名堡中賊鎗雨注馬勇陣亡四名受傷二十餘名營官武朝聘右腕亦帶子傷徐占彪得報自洪水馳回卽夜馳赴城南見渠流忽斷知該逆正堵塞渠口遣騎馳往覘之擒斬六名仍決渠口引流而下十二日徐占彪仍督隊割麥誘之賊仍不出十三夜徐占彪挑勇卒潛襲南門外三里許賊

築新堡克之賊分竄入城僅獲斬十餘名卽移營駐紮
十四日賊千餘排列四壩堡前後比官軍出隊則縮入
堡開鎗俯擊徐占彪令團勇蛇行渠內亦以叉子鎗側
准轟擊斃賊廿餘名賊隊稍多處以開花礮轟之傷賊
亦多追至城邊收隊十五日辰刻城賊七八千由南門
蜂擁而出仍伏麥地時開鎗向營轟擊徐占彪飭各營
按隊勿出僅以礮山礮遙轟之是日天氣炎熱未申之
交賊已困乏鎗聲漸稀中營鼓角齊鳴桂錫楨李洪超
由北路秦玉盛黃祖福由南路藍明泰齊懷松由中路

徐占彪率宋賢聲康得勝李玉山程連璣等繼之各領所部橫躍入陣將賊衝爲數段立斬悍賊百餘名受傷者不知其數生擒五名賊衆紛潰遁入枯樹堡是夜徐占彪令各步營選銳卒百人與馬隊之趨捷者數百人襲取香莊廟大堡四更銜枚而進甫近堡前斬巡哨賊四名徐占彪令各營隊伍分伏左右麾壯士先登噴筒火彈齊發賊酣臥始覺倉卒不知所爲壯士畢登將香莊堡攻克斃賊數百千總孫三級手斬十長馬建功守備鄭光平勇丁牛金勝生擒阿渾張景福訊據供稱

瑪納斯阿渾也又據賊目馬七供稱六月初六日之戰賊中千長斃者十餘名千長萬長受傷死者猶多所有萬長楊才已經官軍擒獲託楊才供認不諱遂令與張景福羈押一處以備質訊肅城首逆又哀詞乞撫徐占彪諭以且決戰再議現在城外麥禾已割者甫及一半城外堡卡雖破除殆盡護禾之賊叠經擊敗兇狡渠目擒斬已多然攻堅究無善策非多備攻具加派勁旅廣儲糧料不能確操全算臣宗棠赴省城後自當督酌情形妥爲籌辦冀稍紓

聖主西顧之憂至徐占彪一軍西赴肅州前後數十戰
皆洞中機要爲賊所憚諸將士勞烈倍臻應籲懇

天恩先加甄錄以昭激勸記名提督陳春萬黃虎臣均
請

交部從優議敘記名提督驍勇巴圖魯署肅州鎮總兵
王子龍補用總兵樸勇巴圖魯黃祖福補用總兵衛勇
巴圖魯陳登雲升用提督策勇巴圖魯王應興均請

賞換清字勇號題補總兵康德勝李世勣留甘補用則
將桂錫楨請

賞加總兵銜并

賞給勇號儘先副將尙勇巴圖魯齊懷松儘先副將近
勇巴圖魯龍德勝儘先副將陳金勝李玉山均請以總
兵

記名簡放齊懷松龍德勝并

賞換清字勇號藍翎副將銜儘先參將張成義副將銜
儘先參將蕭藍玉均請以副將儘先補用張義成并請
賞換花翎儘先參將騰勇巴圖魯李洪超請免補副將
以總兵升用并

賞換清字勇號儘先遊擊吳古勝陳吉陞請免補參將
以副將儘先補用儘先都司秦玉盛樊振海武朝聘陳
紹武李長樂花翎儘先都司吳仕秀參將銜儘先都司
病萬明均請免補遊擊以參將儘先補用秦玉盛樊振
海武朝聘并

賞給勇號儘先遊擊李濟清請以參將儘先補用并
賞加副將銜儘先都司董陽春請以遊擊儘先補用并
賞戴花翎儘先守備徐春先蒲陽春鄭光平均請免補
都司以遊擊儘先補用并

賞戴花翎守備張維新請免都司以遊擊儘先補用儘
先守備黃越貴李彥芳夏辛酉均請以都司儘先補用
并

賞換花翎藍翎守備方純勝嘉永鑣陳英張宗本均請
以都司儘先補用并

賞換花翎藍翎千總孫三級品聯陞郭三超徐丕先均
請免補守備以都司儘先補用并

賞換花翎藍翎守備銜千總王岐山蔡義興藍翎千總
周德元王安邦黃福廷谷振杰均請以守備儘先補用

并

賈換花翎儘先千總郭汝亭請以守備儘先補用并

賈加都司銜藍翎把總黨湘浦陳天福李道修把總張
宗文張繼春均請免補千總以守備儘先補用黨湘浦
并

賈換花翎軍功藍明泰馬聚德程連璣均請免補外委
把總以千總拔補藍明泰并

賈戴藍翎軍功岳鳳岐白官保于三德均請免補外委
以把總拔補藍翎補用同知直隸州甯州知州張掄文

請免補本班以知府補用升用知州補用知縣徐應魁
請免補本班以同知直隸州知州補用候選縣丞王惠
請選缺後以知縣升用凡以勵前勞而策後效於軍務
大有裨益謹合詞具陳伏乞

皇太后

皇上聖鑒訓示施行謹

奏

同治十一年七月十四日

中衛一帶截擊竄匪片

再據駐紮中衛地方統領蜀軍陝安道黃鼎馳報六月

初八日有逆回數十由阿拉善地方夜踰鎮夷日襲破民堡提督何玉超所部聞警赴援殺賊十餘名初十日賊騎三百餘仍由邊牆越入駛至沙窩何玉超追之不及十一日黃鼎率隊窮搜無迹是夜又有零騎擾石空民莊提督劉治均擊斬數名聞此股係陝回由涼州屬境竄出現經扼隘防剿等情臣維甯夏所屬多與草地毗連老湘一軍熟悉該處情形前飭挑留恭隊三營馬隊二起交提督譚拔萃帶赴甯屬擇要扼紮茲已據報檄飭譚拔萃會同豫蜀各軍探迹兜剿毋任蔓延查甘

涼探報西甯陝回近已編入扁都山日其竄阿拉善者
計係掠食零騎合併聲明謹附片具陳伏乞

聖鑒謹

奏同治十一年七月十四日

同治十一年七月二十四日內閣奉

上諭左宗棠穆圖善奏官軍逼勦肅州攻拔賊壘一摺
肅州賊匪與塔爾灣等處賊巢相爲犄角五月二十七
日徐占彪親率隊伍直趨塔爾灣分隊進攻立將賊堡
四座墩卡十九座攻克生擒賊匪十餘名塔爾堡之賊

前來援應復經官軍擊退六月初二只攻拔塔爾堡賊
巢奪獲鎗炮器械無算初四日各營分攻黃草壩三堡
斬馘甚多乘勝將小堡二十餘座攻克肅城西南墩堡
百餘座均一律蕩平官軍直薄城下該逆死踞枯樹堡
疊經官軍勦擊并掃蕩香莊廟大堡生擒阿渾張景幅
一名現在肅城之賊勢已窮蹙勦辦尙爲得手在事各
員弁自應量予獎勵提督陳春萬等均著交部從優議
敘王子龍著賞換吉里杭阿巴圖魯名號總兵黃祖福
著賞換阿克敦巴圖魯名號陳登雲著賞換西濟爾琿

巴圖魯名號提督王應興著賞換圖桑阿巴圖魯名號
題補總兵康得勝等著賞加總兵銜康得勝并賞給克
勇巴圖魯名號李世勤著賞給効勇巴圖魯名號桂錫
楨并賞給精勇巴圖魯名號副將齊懷松等均著以總
兵記名簡放齊懷松并賞換噶爾薩巴圖魯名號龍德
勝并賞換錫林巴圖魯名號參將張成義等均著以副
將儘先補用張成義并賞換花翎李洪超著免補副將
以總兵升用并賞換經僧額巴圖魯名號遊擊吳占勝
等均著免補參將以副將儘先補用都司秦玉盛等於

著免補遊擊以參將儘先補用秦玉盛并賞給勛勇巴圖魯名號樊振海并賞給赫勇巴圖魯名號武朝聘并賞給達勇巴圖魯名號遊擊李濬清著以參將儘先補用並賞加副將銜都司董陽春著以遊擊儘先補用并賞戴花翎守備徐春先等均著免補都司以遊擊儘先補用并賞戴花翎張維新著免補都司以遊擊儘先補用黃起貴等均著以都司儘先補用并賞戴花翎方純勝等均著以都司儘先補用并賞換花翎于總孫三級等均著以都司儘先補用并賞換花翎王岐山等均著

以守備儘先補用并賞換花翎千總郭汝亭以守備儘
先補用并賞加都司銜把總黨湘浦等均著免補千總
以守備儘先補用黨湘浦并賞換花翎軍功藍明泰等
均著免補外委把總以千總拔補藍明泰并賞戴藍翎
岳鳳岐等均著免補外委以把總拔補補用同知直隸
州知州張掄文著免補本班以知府補用補用知縣徐
應魁著免補本班以同知直隸州知州補用縣丞王惠
著候選缺後以知縣升用該部知道欽此

軍機大臣 字寄同治十一年七月二十四日奉

上諭左宗棠等奏官軍偪剿肅州踞匪並中衛一帶截擊竄匪情形各摺片覽奏均悉本日業經明降諭旨將提督陳萬春等照所請獎勵矣逆匪久踞肅州負隅抗拒現經徐占彪一軍疊次偪剿攻拔近城之塔爾灣堅巢並掃蕩城西賊壘百餘座擒斬著名逆目多名剿辦甚爲得手逆匪經此懲創兇醜稍衰自應乘此聲威力圖攻克該匪前次降而復叛現又哀詞乞撫難保非因攻剿緊急暫爲緩兵之計左宗棠現已進紮省城著卽酌度情形妥爲調度檄飭徐占彪督率各營迅速圍攻

並將關內外援賊隨時相機截剿則孤城自不難力救
陝回由涼州屬境竄出邊外復由阿拉善旗入邊肆擾
雖經防軍擊退惟賊蹤飄忽去來無定且蒙古地方亦
恐被其蹂躪著左宗棠飭令譚拔萃會同黃鼎所部各
營探蹤截剿并知會張曜派軍合力兜擊悉數殲除毋
任分竄穆圖善著仍遵前旨候省防事宜交代清楚再
行率隊東行並著與左宗棠會籌一切以期共維大局
將此由六百里諭令知之欽此

後路肅清進駐省城片

再甘北逆目狗齒牙卽楊繼芳等伏誅後鹽茶固原東西兩山逆目僅馬母驢李萬海在逃未獲六月二十一日陝西提臣雷正綰將馬母驢卽馬成榮並其死黨二十餘犯悉數弋獲臣批飭處以極刑甘南回目蘇舍利夫馬姑九率殘匪二百餘款營呈繳馬械已發交總理營務處候補按察使陳湜分別安插其清水逆目鄧大有一犯已經階州防營三月二十六日轟斃海珍等一起零匪七月初一日總兵馬有才截之王家堡悉數擒斬李萬海一犯經提督蘇家良於七月初八日生擒解

營訊明礮死所有著名各首逆均已辦竣後路已就肅
清臣於七月十五日進駐省城調派各軍致力西路以
清邊圉所有後路肅清進駐省城情形謹附片具陳伏
乞

聖鑒謹

奏

同治十一年七月十四日

逼攻肅州連克賊壘招

奏爲官軍逼攻肅州連克枯樹四壩北崖頭各壘卡并
力拔朱家堡堅巢附城賊蹤一律掃蕩情形恭摺馳陳
仰祈

聖鑒事竊提督徐占彪六月十五日以前戰事臣等已
於七月十四日由驛馳陳在案查附城賊巢自塔爾灣
黃草壩等處攻克後惟城東朱家堡牆堅濠深賊恃以
爲固又城北北崖頭城南枯樹城東南四壩等處墩堡
環峙徐占彪已率隊繞紮肅城西南而獲留運道及留

紫三仙洞各營遠在城東若枯樹及四壩地方不卽攻拔則兩路官軍終虞隔閡六月十七日徐占彪飭正營進紫校場以東適城逆數百出南城刈麥密飭馬隊繞城根截其歸路朱家堡及枯樹各堡出隊爲援徐占彪親出擊敗之其刈麥者亦逃入枯樹堡追斬數十名擒六名盡奪其牲畜麥捆城卡鎗礮擡發官軍亦有傷亡徐占彪詳審城勢枯樹三堡六墩負城設險必繞城濠以襲其後遂親挑奮勇百二十名夜率以行仍列隊河灘作勢仰攻并調開花礮向堡轟擊逆賊憑牆外禦徐

占彪已繞伏城濠以洋礮測準擊登陴者守賊應聲而
倒餘賊驚潰各墩堡同時竄逸夜黑未及窮追遂移營
壘紮其堡獲鎗械多件二十一日偵報賊出東門繞竄
東南料必赴塔爾灣搶收餘麥率馬隊追及之賊捆載
將行見兵至驚走追斬數十名奪驢騾數百四壩麥穗
黃熟該處賊堡凡十一緊連朱家堡二十一日飭新左
新中及三四起馬隊繞東關濠邊撲入兼堵朱家堡援
賊飭正右歸化副右攻其南徐占彪率副將桂錫楨護
開花礮馳入壩中左右轟擊又令副新後兩營由三仙

洞橫攻各堡自卯至午副新後兩營先破東大堡一座
餘堡奪門四竄追斬極多旋移軍紮入加築木城所遺
三仙洞營壘以團勇填紮自是東西兩路各營始聯成
一氣是夜新後營又襲破雷台廟東面大墩黎明瞥見
西廢堡有踞賊馬隊擊走之二十四日城逆馬四具稟
請退兵十里廳獻城自贖徐占彪稔其詐不允攻朱家
堡益急於該堡南北各紮營卡斷其運糧及出汲之路
閱一晝夜工竣賊益洶懼二十五日各營備攻具填濠
齊進徑薄賊牆賊棄堡狂奔追殺極多獲大礮一尊軍

械無算調右營進紮該堡自是肅城東西南三面賊壘盡矣惟北崖頭有廢堡尙爲賊據十九日徐占彪率隊馳往賊腐聚麥地且刈且縛曳以牛車官軍擊之賊潰遂焚其麥復追迫竄賊賊入廢堡中憑牆放鎗徐占彪坐馬受傷棄馬步戰弁丁益奮立將此堡攻破餘堡之賊亦悉數擒斬於是附城概無賊壘七月初一日徐占彪率隊歷北稍門至西門賊惟憑牆施放鎗炮誘之不出遙見西北山邊有賊刈麥揮隊接殺斃賊數十獲賊供稱萬長馬行五已爲官軍所斬歸歷塔爾灣遇有刈

麥零賊盡殲之城賊終不復出初二日復出歷各壩迄
無賊踪撤隊後城逆遽以三四百名出東門割城根餘
麥桂錫楨回軍馳擊殲悍賊多名餘悉滾滾見水而逸
此六月十七日起至七月初二日止徐占彪晉獲全勝
攻克朱家堡堅巢掃蕩附城賊壘之實在情形也臣維
肅逆狡黠異常環城築壘爲負隅之勢徐占彪提軍深
入由西南橫掃而東而北奮進無前所有附近堡寨墩
卡悉數盡平肅城孤立該將并苦戰之功自應量乞
恩施以昭激勸并用提督肅章林遇缺題補總兵李登

第蘇洪勝均請以提督補用并

賞給勇號補用副將蕃勇巴圖魯宋賢聲儘先副將李
占雄雷大興張邦銀均請以總兵補用宋賢聲并請

賞換清字勇號李占雄雷大興張邦銀并請

賞給勇號副將銜參將胡正魁陳得勝均請以副將儘
先補用并請

賞加總兵銜花翎遊擊馬良驥請以參將儘先補用并
請

賞加副將銜花翎都司阮玉超趙洪勝吳完品均請以

遊擊儘先補用花翎守備李得宜請免補都司以遊擊
補用藍翎守備劉殿邦朱奎龍羅平安鄧洪貴儘先守
備李生財李登榮吳魁盛李貴芳均請以都司儘先補
用劉殿邦朱奎龍羅平安鄧洪貴并請

賞換花翎李生財李登榮吳魁盛李貴芳并請

賞戴藍翎藍翎千總黃均廷熊飛鵬任萬斌張青山楊
世太吳源陞均請以守備儘先補用并請

賞換花翎藍翎河南撫標拔補千總劉合春請以守備
仍歸河南撫標補用并

賞換花翎儘先千總趙應彪請以守備儘先補用并請
賞戴藍翎藍翎把總楊世榮李萬清均請免補千總以
守備儘先補用軍功牛全勝任洪度劉世東楊生寶治
士俊均請免補外委以把總儘先補用所有原稟擬保
各文員均俟肅州克復後核明實在勞績稟案請保庶
足以作士氣而勵軍心謹合詞具陳伏乞

皇太后

皇上聖鑒訓示施行謹

奏
同治十一年八月初一日

同治十一年八月十一日內閣奉

上諭左宗棠穆圖善奏官軍逼攻肅城連克賊壘一招肅州賊匪自塔爾灣黃草壩攻克後惟恃朱家堡等處賊巢堅固負隅抗拒現經徐占彪督率兵勇由西南轉戰東北立將肅城附近賊堡悉數盪平賊勢已孤剿辦尙爲得手在事出力各員自應量予獎勵并用提督蕭章林等均著以提督補用蕭章林并賞給才勇巴圖魯名號李登第并賞給匡勇巴圖魯名號蘇洪勝并賞給勵勇巴圖魯名號副將宋賢聲等均著以總兵補用宋

賢聲並賞換綢僧額巴圖魯名號李占雄并賞給育勇
巴圖魯名號雷大興并賞給續勇巴圖魯名號張邦銀
并賞給俊勇巴圖魯名號參將胡正魁等均著以副將
儘先補用并賞加總兵銜遊擊馬良驥著以參將儘先
補用并賞加副將銜都司阮玉超等均著以遊擊儘先
補用守備李得宜著免補都司以遊擊補用劉殿邦等
四員并賞換花翎李生財等四員并賞戴藍翎千總黃
均廷等均著以守備儘先補用并賞換花翎千總劉台
春著以守備仍歸河南撫標補用并賞換花翎趙應彪

著以守備儘先補用并賞戴藍翎把總劉和順等均著
免補千總以守備儘先補用并賞戴藍翎楊世榮等均
著免補千總以守備儘先補用軍功牛全勝等均著免
補外委以把總儘先補用該部知道欽此

軍機大臣 字寄同治十一年八月十一日奉

上諭左宗棠穆圖善奏官軍逼攻肅州連克賊壘一摺
徐占彪一軍攻剿肅州逆匪疊克枯樹四壩北崖頭各
壘卡及朱家堡堅巢附城賊蹤一律掃蕩辦理尙屬得
手本日業經明降諭旨將出力各員照所請獎勵矣肅

州之賊疊經徵創自巳勢孤膽落着左宗棠等檄飭徐
占彪乘此聲威穩慎進取以期力拔堅城毋得輕率受
撫致爲賊匪所給至成祿一軍久駐高臺尙無行期登
據奏稱車馬糧石均形缺乏此軍雖難期得力然使因
糧缺譁潰必致貽患地方左宗棠務當飭令甘涼安肅
二道妥籌接濟不得稍有膜視將來此軍進止朝廷別
有權衡也將此由五百里各諭令知之欽此